

REZOLUTË

PËR REKOMANDIMIN E KOMISIONIT EVROPIAN PËR HAPJEN E NEGOCIATAVE TË ANËTARËSIMIT MIDIS BASHKIMIT EVROPIAN DHE SHQIPËRISË

- Në zbatim të Kushtetutës së Republikës së Shqipërisë, të ligjit nr. 15/2015, “Për rolin e Kuvendit në procesin e integritetit të Republikës së Shqipërisë në Bashkimin Evropian”, të Rregullores së Kuvendit të Republikës së Shqipërisë dhe duke marrë në konsideratë rolin e Kuvendit, si organi më i lartë ligjvënës dhe kontrollues;

- Në respekt të mbështetjes së gjerë popullore për anëtarësimin e Republikës së Shqipërisë në Bashkimin Evropian;

- Duke riafirmuar se objektivi strategjik i Republikës së Shqipërisë është anëtarësimi në Bashkimin Evropian;

- Duke riafirmuar mbështetjen tonë të palëkundur për të respektuar vlerat mbi të cilat ndërtohet Bashkimi Evropian dhe vendosmërinë tonë për zhvillimin e një shoqërie demokratike, bazuar në sundimin e ligjit, respektin për të drejtat e njeriut, përfshirë të drejtat e minoriteteve, dhe parimet e ekonomisë së tregut;

- Duke theksuar vendosmërinë tonë për konsolidimin e një kuadri ligjor tërësisht të përpunur me legjislacionin e Bashkimit Evropian dhe të një administrate publike eficiente për zbatimin e këtij legjislacioni;

- Duke vlerësuar se e ardhmja e Ballkanit Perëndimor është në Bashkimin Evropian dhe se bashkëpunimi rajonal është pjesë e pandarë e procesit të anëtarësimit në Bashkimin Evropian;

- Duke nënvizuar rëndësinë gjeopolitike të procesit të zgjerimit, si për shtetet candidate apo candidate potenciale, ashtu edhe për vetë Bashkimin Evropian;

- Duke vlerësuar mbështetjen që Bashkimi Evropian ka dhënë për Shqipërinë për forcimin e demokracisë dhe zhvillimin ekonomik e social;

- Me bindjen se përparimi i Shqipërisë në procesin e anëtarësimit bazohet në meritë, në përputhje me reformat dhe arritjet konkrete;

- Duke besuar plotësisht se anëtarësimi në Bashkimin Evropian do të kontribuojë në zhvillimin e gjithanshëm të Republikës së Shqipërisë, në forcimin e sigurisë kombëtare, në zhvillimin ekonomik dhe përmirësimin e mirëqenies së qytetarëve shqiptarë;

- Duke marrë në konsideratë zbatimin e mirë dhe të qëndrueshëm të Marrëveshjes së Stabilizim-Asociimit mes Republikës së Shqipërisë dhe Komuniteteve Evropiane dhe Shteteve të tyre anëtare;

- Duke marrë në konsideratë përparimin e bërë nga Shqipëria në plotësimin e rekomandimeve kyçe të Komisionit Evropian;

- Duke marrë në konsideratë rekomandimin e Komisionit Evropian për hapjen e negociatave, si konfirmim të përparimit të bërë nga Republika e Shqipërisë;

- Duke marrë në konsideratë se rekomandimi i Komisionit Evropian për hapjen e negociatave të anëtarësimit është një nxitje për të përshpejtuar reformat e gjithanshme dhe, në veçanti, reformën në drejtësi;

- Duke marrë parasysh rekomandimet e Komitetit Ndërparlamentar të Stabilizim-Asociimit Shqipëri-BE;

- Duke marrë në konsideratë reformat e ndërmarra në kuadër të procesit të integritetit evropian, si reforma në drejtësi dhe reforma të tjera për konsolidimin e funksionimit të shtetit të së drejtës dhe respektimin e të drejtave të njeriut;

- Duke marrë në konsideratë faktin që dialogu politik, i realizuar nëpërmjet gjithëpërfshirjes

dhe transparencës, është element kyç për përparimin e Shqipërisë në procesin e integritimit evropian;

KUVENDI I REPUBLIKËS SË SHQIPËRISË

1. Mirëpret Raportin e Komisionit Evropian të vitit 2018 për progresin dhe shkallën e përgatitjes për anëtarësim të arritur nga Shqipëria.

2. Vlerëson rekomandimin e Komisionit Evropian për hapjen e negociatave të anëtarësimit mes Republikës së Shqipërisë dhe Bashkimit Evropian, si njohje të qartë të arritjeve të Shqipërisë në ndërtimin e shtetit të së drejtës, e specifikisht në reformën në drejtësi, luftën kundër krimit të organizuar dhe korrupsionit, reformën në administratën publike dhe mbrojtjen e të drejtave të njeriut.

3. U bën thirrje njëzëri vendeve anëtare të BE-së që të marrin vendimin për fillimin e negociatave të anëtarësimit midis Bashkimit Evropian dhe Shqipërisë, si fillimi i një rruge për shndërrimin e mëtejshëm evropianizues të vendit, me vetëdije se kjo do të jetë një rrugë e vështirë dhe e gjatë, por se hapja e negociatave do t'i japë shpresë dhe orientim këtij rrugëtimi.

4. Shpreh vullnet të plotë për të ecur në rrugën e reformave në frymën e mirëkuptimit ndërpartiak dhe në bashkëpunim të plotë me shoqërinë civile.

5. Thekson se angazhimi i qëndrueshëm për përmbushjen e rekomandimeve të Komisionit Evropian dhe të institucioneve të tjera ndërkombëtare përbën përparësinë kryesore të punës së Kuvendit të Shqipërisë, të Qeverisë dhe të institucioneve të tjera.

6. Angazhohet të shqyrtojë me prioritet projektligjet që synojnë përafrimin e legjislacionit shqiptar me legjislacionin e Bashkimit Evropian apo kanë rëndësi për procesin e anëtarësimit në Bashkimin Evropian.

7. I kërkon Qeverisë të thellojë dhe të përshpejtojë ritmin e reformave të ndërmarra, veçanërisht të reformave që lidhen me sundimin e ligjit.

8. I bën thirrje Qeverisë që rekomandimet e Paketës së Zgjerimit 2018 të shërbejnë si udhëzues në përpjekjet për përshpejtimin e procesit të anëtarësimit në Bashkimin Evropian.

9. Angazhohet që të përdorë çdo instrument të diplomacisë parlamentare në funksion të përshpejtimin të procesit të anëtarësimit në Bashkimin Evropian.

10. Angazhohet që të zhvillojë dhe të forcojë më tej aktivitetin e Këshillit Kombëtar për Integritimin Evropian, për rritjen e transparencës në procesin e integritimit evropian nëpërmjet gjithëpërfshirjes së aktorëve pjesëmarrës;

11. I kërkon Qeverisë që të forcojë marrëdhëniet e fqinjësisë së mirë dhe të zgjerojë pjesëmarrjen në nismat rajonale.

12. I kërkon Qeverisë që të zgjerojë pjesëmarrjen në Procesin e Berlinit, duke përmirësuar hartimin dhe zbatimin e projekteve të ndërlidhshmërisë.

Miraturar në datën 24.5.2018

**KRYETARI
Gramoz Ruçi**